

8JH-31
J 75.

AGIM ISAKU



roman

8JH-31
J25.

Agim
Isaku



HIJA

Roman

SHTËPIA BOTUËSE «NAIM FRASHËRI»
TIRANE

KAPITULLI I

Dielli po perëndonte i kuq dhe i madh si për rrafshultës bregdetare. Mbi pellgjet e shumta të rezervatit të gjuetisë, po rrëshqiste kështu një muzg i lehtë paravjeshte, i pandjeshëm, si i zbutur nga lagështia e detit. Gjithë po aq pandjeshëm rrëshqiste mbi ujëra një varkë e lehtë dhe e gjatë druri. Në bashin e saj, mbështjellë me një xhakavento të madhe ushtarake, rrinte si i mpirë kryetari i shoqatës së gjahtarëve. Çiftët e kishte të mbështetur në supin e majtë. Një djalë i ri truphequr, mbase i biri i rojtarit të rezervatit, e shtynte varkën me një hu të gjatë që e ngulte ritmikisht në tokën e butë, poshtë ujit të cekët. Vetëm kur varka po kalonte fare pranë pritës së tyre, Reshat Zagora pa në fundin e saj një rrjetë me rrëth druri, nga ato që

natyralistët i përdorin për të kapur fluturat. Tani rrjeta mblidhë dritën e fundit të asaj dite të ngrohtë.

Reshat Zagora lëvizi këmbën e djathtë që i ishte mpirë. Poshtë tij kërcitën barërat e thata. Larg u dëgjuan rrahje të shpejta krahësh. Nga fëshfërima e mprehtë ai e kuptoi se ishin rosat dhe u kthyë sërisht në drejtim të gjahut. Rosat i mbyllën krahët për të zënë vend në një prej brigjeve të përtejme, pas kallamave që tani e kishin tharë gjethin e tyre të fundit. U ndër një heshtje e ankthshme që dukej sikur po e gërvishqte sipërfaqen e ujërave. Pastaj rosat i hapën flatrat përsëri për të zbutur uljen dhe, në çast, u dëgjuan të shtëna armësh, lehje zagarësh, pastaj rrahje të alarmuara krahësh. Të trembura, gjithë duke fituar lartësi e shpejtësi, rosat po vinin drejt pritës ku kishte zënë vend ai. Nëpër zhukat e rënduara nga kërmijtë u dëgjua sërisht kënga e bulkthave. Rosat kaluan pikërisht sipër grykës së armës së tij, por Reshati nuk pati asnë dëshirë për të qëlluar. Ato ikën duke u përpjekur të vinin një lloj rregulli në rreshtimin e tyre. Kërkonin një vend tjetër ku të kalonin natën, mbështetur përtej pyllit të vogël, por Reshati e dinte se atje kishte gjahtarë të tjera.

U dëgjuan lehje të tjera zagarësh, kësaj radhe më afër, pastaj plaquritje në ujë. Me sa duket ndonjë nga rosat e goditura kishte rënë në kënetë.

— Pse nuk qëlluat?

Reshati ktheu kokën dhe pothuaj u habit kur pa se nuk ishte vetëm në pritë. E kishte harruar fare Fore Farashukun, fytyra e gjerë e të cilët, dy pëllëmbë më tej, ishte skuqur e gjitha. Arma i dridhej në dorën e madhe gishta-trashë.

— Të kishit qëlluar! — tha Fore Farashuku, kësaj radhe me zë të butë, sikur përpinqej të shtypte poshtë tij qortimin që i lejoi vetes pak sekonda më parë. — Me siguri që fishekët nuk do t'ju shkonin kot. — Dhe qeshi me gjysmën e poshtme të fytyrës, si pér t'i kërkuar falje.

— Pse nuk qëllove ti? — ia ktheu fare qetësisht Reshati duke e ulur armën mbi gjunjë.

— Unë? Po ja, ashtu... kujtova se do të qëllonit ju dhe... prita, pra nuk qëllova, hë...

Përtej grumbullit të vogël të pemëve që përpinqeshin më kot të dukeshin si pyll, u dëgjuan të shtëna të njëpasnjëshme. Pastaj lehje zagarësh. Klithma të shpeshta zogjsh nate. Plaquritje në ujë. Fërfëllimë flatrash. Krisje barërash të thata.

Reshati e theu armën siç e kishte mbi gjunjë dhe hoqi fishekët duke i kapur me thonjtë e fortë.

— Nuk do të gjuajmë më? — pyeti me një lloj pakënaqësie Fore Farashuku.

— Jo. Ti po të duash vazhdo. Unë po të pres në hotel.

Fore Farashuku u ngrit i pari.

— Unë për ju erdha. Ju e dini, se mos kam ndonjë pasion të madh për gjahun unë! Po ikim bashkë.

— Ikim! — përsërithi edhe Reshati, por nuk lëvizi nga vendi. Mbi sipërfaqen e ujit që reflektonë një dritë të mugët, po kthehej varka e lehtë prej druri. Lëvizjet e djalit tani ishin më të shkathëta. Në pupë ishte ulur një vajzë veshur me bluzë të bardhë, me sa duket ndonjë nga punonjëset e fazanerisë pranë rezervatit. Në prehër mbante një kovë të madhe plastike. Diçka trazonte pa pushim aty brenda, përhumbshëm, dhe Reshati pati ndjesinë se nga çasti në çast ajo do të fillonte të shpérndante nëpër sipërfaqen e lëmuar të **ujit ushqim** për zogjtë. Si në kohët e lashta, tha me vete Reshati duke provuar një ndjenjë qetësuese përjetësie.

— Ikim? — pyeti Fore Farashuku që rrin te në këmbë me çantën e marshimit hedhur në njërin sup.

Reshati nuk foli dhe iu duk sikur e folura e tjetrit, duke thyer qetësinë që mbretëronte përqark, i hiqte edhe atij diçka nga shpirti. Sigurisht Fore Farashuku nuk kishte asnjë faj përkëtë. Mbase e kishte fajin ajo rrjeta në fundin e varkës që, pasi kishte mbledhur dritën e fundit të ditës, ishte kthyer tani për të marrë diçka edhe tek ai.

Ujërat ishin bërë të errëta dhe klithma e vetmuar e një zogu nate i ktheu në shpirt një ndjenjë të pakuptueshme turbullire. U desh edhe

pingërima tepër e veçantë e një zogu tjetër, që turbullira të mblidhej lëmsh dhe, duke u lëkundur si pendul, t'i lëndonte gati materialisht rropullitë, të cilat, teksa përpinqeshin t'i iknin goditjes së saj, ishin larguar nga vendet e veta dhe kishin dalë pothuajse në kafazin e kraharorit.

U mbështet me shpinë pas gardhit të pritës. Nga ky pozicion i ri mund të shikonte nga 500-600 metra më tej një kasolle të vogël kashte. Ndërtimi i saj, qetësia që e rrethonte, bluja e mbyllur që kullonte sipër kulmit tepër të pjerrët kishte diçka nga filmat dhe atij iu kujtua Bert Drenica. Sa muaj kishte pa e takuar? Dy? Tre? Në takimin e fundit ai i kishte thënë se po përgatitej të xhironte një film me një ndodhi disi të rrallë vrasjeje. Madje edhe titullin provizor ashtu e kishte menduar: «Ndodhi e rrallë.»

— Reshat, o Reshat! — dora e madhe e Fore Farashukut po e tundte për supi. Me sa duket përdiçka i kishte folur, por ai nuk e kishte dëgjuar. Fytyra e shokut dukej e shqetësuar sinqerisht dhe atij i erdhi mirë.

— Po, — tha ai më në fund, — the gjë?

— Asgjë, asgjë... Thashë se mos ishit i sëmurë...

— Jo, Fore, jam mirë. Mos ki merak përmua.

— Po rrinit pa folur, si i përhumbur dhe unë kujtova se mos... — Fore Farashuku lëshoi një të qeshur dhe, mes së qeshurës e gjeti

me vend tē shtonte: — Harrova fare se kam tē bëj me një kryetar rrëthi! Hallet që keni ju, problemet që ju ziejnë nē kokë... Është një rrëth i gjithë që pret mendjen tënde...

Goditja e tophit prej leshi që kishte ndier pak më parë t'i mblidhej nē gjoks kësaj radhe ishte qendrore, pikërisht nē zemër.

— Jo, — tha me nervozizëm Reshati. — Po mendoja gjëra fare pa rëndësi, madje nuk po mendoja fare, po tē duash tē tē them tē vërteten. Po kujtoja, për shembull, kasollen nē bahan tuaj, fotografitë e Andreas varur nëpër mur...

— Ha-ha-ha! — qeshi Fore Farashuku kot, duke vënë nē lëvizje vetëm pjesën e poshtme tē kokës, ndërsa balli ishte po ai i pari, i tendosur dhe i vëmendshëm, sikurse sytë e vegjël. Sa mirë kishte qenë pak më parë, kur ai kishte qenë i shqetësuar. Thjesht i shqetësuar.

Si i kishte thënë nē një prej takimeve tē fundit Bert Drenica? Po pinin kafe nē barin e qetë, ndërtuar sipër qytetit. Reshati po tregon. Berti sillte nëpër gishta filxhanin bosh tē kafesë. Luga e vogël nē tē bënte një zhurmë nervouese. Pse nuk tregon edhe ti diçka?, i kishte thënë dikur Reshati. Berti kishte ngritur supet e fuqishme. Tufa e flokëve tē drejtë i kishte zënë gjysmën e ballit tepër tē lartë. Pastaj, duke vënë buzën nē gaz me mundim, sikur kjo t'i shkaktonte dhimbje, kishte shtuar: Kur rri me njerëz si ju, është pak e vështirë tē flasësh.

Më mirë të dëgjosh. Reshati e kishte kapur lehtësisht atë ton të veçantë të zërit të Bertit, por nuk kishte dashur ta besonte se ishte ironik. Domethënë?, kërkoi sqarim të mëtejshëm ai. Domethënë, kishte vazhduar kësaj radhe drejtpërdrejt Bert Drenica, ju keni fituar zakonin e keq që vetëm të flisni. Dëgjoni pak ose aspak të tjerët. Reshati kishte heshtur. Nuk e kishte pritur këtë nga një mik dhe në përgjithësi nuk i pëlqenin afrime të tilla të tepruara. Kishte vënë re se e njëjta gjë i ndodhte edhe me Greta Tytymçen, sekretaren e komitetit. Edhe ajo, duke shfrytëzuar njohje të vjetra... U ngrit, tha se kishte një takim dhe iku.

Duke kujtarë këto, Reshati pshërëtiu dhe u mbush thellë me frymë.

— Eh, — bëri fare pranë tij, tanë pothuajse në terr, Fore Farashuku. — Eh, hallet! Sa halle ka njeriu!

— Fore, — tha Reshati gati me inat, — nuk kam asnje hall. Asnjë. Qartë?

— Qartë, — tha Fore Farashuku duke rregulluar edhe një herë çantën në supin e majtë.

Reshati u ngrit.

— Do ikim? — pyeti tjetri pa qenë nevoja.

Reshati u nis përpëra. Kishte dalë hëna dhe hijet e tyre të gjata e të errëta dukej sikur thyenin në kalim barërat dhe zhukat anash shtegut të ngushtë nëpër të cilin ecnin. Por ata kalonin dhe bimësia ngrihej përsëri, e spërkatur me hënë.

Gjysmë ore më vonë ishin në kompleksin e hotel-klubit pranë detit. Reshati i tha shoferit të mbyllte makinën dhe të vinte të darkonte me ta, por ai iu përgjigj se kishte nevojë të shkonte pasi kishte lënë njërin nga djemtë pa qejf.

— Mund të vish nesër të na marrësh?

— Kur të urdhëroni, — tha Sabriu.

Sapo kapërcyen derën e jashtme të hotel-klubit, u mbështollën me erën e tij karakteristike, një erë vjetërsie, lagështie, kuzhine të mirë dhe tym duhani. Megjithëse gjahtarët e tjerë nuk ishin kthyer ende, të dyja sallat e ngrënies ishin plot. Ishte e shtunë. Një kamerier me ftyrë të zeshkët e tepër të mprehtë u hoqi udhë mes tavolinave. Shumë veta kthenin kokën për t'i parë dhe dy punonjës të komitetit të Partisë u ngritën në këmbë. Reshati shkoi t'i takonte. Fore Farashku gjithashtu u zgjati dorën e tij të madhe. Njëra nga gratë e punonjësve të Komitetit të Partisë u skuq në ftyrë ndërsa thoshte fjalët e pakta të përshëndetjes dhe Reshati pati përshtypjen, se diku e kishte takuar edhe herë tjetër.

Kamerieri i priste në hapësirat mes tavolinave. Peceta e bardhë në parakrahun e tij të majtë dukej si një tabelë ku mund të shkruhe-
shin porositë.